

# Om å kartleggja mørk materie med maskinlæring

Hans Georg Schaathun<sup>1</sup>, Ben David Normann<sup>2</sup> og Kenny Solevåg-Hoti<sup>3</sup>

<sup>1</sup> [georg@schaathun.net](mailto:georg@schaathun.net)

<sup>2</sup> [ben.d.normann@ntnu.no](mailto:ben.d.normann@ntnu.no)

Institutt for IKT og realfag

Fakultet for informasjonsteknologi og Elektroteknikk

<sup>3</sup> [kenny.solevag-hoti@ntnu.no](mailto:kenny.solevag-hoti@ntnu.no)

Universitetsbiblioteket

NTNU — Noregs Teknisk-Naturvitenskaplege Universitet  
6025 Ålesund, Norway

**Samandrag** Gravitasjonslinsing er fenomenet der ljós frå fjerne himmellegeme vert avbøyd av tyngdekraften frå andre himmellegeme, som ofte ikkje er fullt synlege fordi mykje av massen er mørk materie. Observert gjennom ei gravitasjonslinse, framstår fjerne galaksar som forvrengde. Der er mykje forskingsaktivitet som freistar å karleggja mørk materie ved å studera linseeffektar, men dei matematiske modellane er kompliserte og utrekningane krev i dag mykje manuelt arbeide som er svært tidkrevjande. I denne artikkelen drøftar me korleis me kan kombinera rouletteformalismen å Chris Clarkson med maskinlæring for automatisk, lokal estimering av linsepotentialet i sterke linser, og me presenterer eit rammeverk med programvare i open kjeldekode for å generera datasett og validera resultat.

**Nykelord:** gravitasjonslinsing · maskinlæring · rouletteformalisme · mørk materie · simulering

## 1 Innleiing

Eit av dei store måla i kosmologien er å kartleggja universet. Moderne teleskop gjev tilgang til eit enormt biletmateriale, men om lag 85% av massen er ikkje synleg. Sokalla mørk materie gjev ikkje frå seg ljós. Fysikarane veit lite om denne materien, men han må vera der for at den generelle relativitetsteorien skal stemma med observasjonane. For å lokalisera den mørke materien, må ein sjå korleis han påverkar andre, synlege fenomen. Sidan ljuset vert påverka av tyngdekraften, vil mørk materie kunna danna sokalla gravitasjonslinser, som forvrenger bilete av meir fjerne galaksar. Dette er analogt til vanlege, optiske linser. Sjå t.d. Bertone og Tait (2018).

Ved å studera forvrengde bilete av fjerne galaksar, er det råd å utleida plasering, form, og storleik på gravitasjonslinsene, men utrekningane er komplekse og med dagens teknikkar tek det fleire dagar med manuelt arbeide å rekonstruera ei

linse. Ei rekkje forfattarar har brukta maskinlæring på ulike måtar for å analysera gravitasjonslinser. Hezaveh mfl. (2017) parameterbestemmer ein singulær, isotermt, elliptisk linsemodell (SIE) med sterkt linsing. Biggio, L. mfl. (2023) bruker representasjonslæring for å finna eit nevralt nettverk som tilnærmer ei spesifikk linse. Der er også ei rekkje klassifiseringsmodellar for å finna linser på nattehimmelen.

Kvar tilnærming byggjer på bestemte modelleringsparadigme med ulike styrkar og lyte; ingen gjev ei komplett og generisk løysing. Ei særleg utfordring er sokalla klyngelinser, der fleire massekontrasjonar bidreg til linseeffekten på det same biletet. I denne artikkelen føresleg me, heller enn å søkja ei global skildring av linsa, å gje ei lokal skildring av *effekten av linsa* i eitt punkt på nattehimmelen. Den lokale skildringa byggjer på rouletteformalismen etter Clarkson (2016a), som søker å visa ut det konvensjonelle skiljet mellom svak og sterkt linsing.

Hensikta med artikkelen er å etablira eit rammeverk og programvare for å støtta vidare arbeide med maskinlæring på rouletteformalismen, innanfor både informatikk og fysikk. Kjernen er roulettesimulatoren (sjå Schaathun mfl., 2023), som let oss syntetisera treningsdata. Her skal me imidlertid fokusera på prosessen som heilskap, og korleis maskinlæringa kan brukast til å bestemma koeffisientane i rouletteformalismen, og ikkje berre bestemma parameter i ein postulert linsemodell. Avsnitt 3 presenterer roulettesimulatoren. Avsnitt 5 gjev eit konseptprov for å visa at maskinlæring er lovande, men i all hovudsak står dette att som eit ope problem.

## 2 Modell og Problem

All materie, både ljós og mørk, oppfører seg som ei linse som forvrenger biletet av fjernare galaksar. Eddington målte avbøyninga i solskenet under ei solformørking i 1919 og viste samsvar med den generelle relativitetsteorien etter Einstein. Omfattande teoretisk arbeide er gjort sidan den gongen, og til tross for periodar med pessimisme pga. skrinne observasjonar og dårlig opplysing, er gravitasjonslinsing no vorte eit av dei mest lovande verktya for informasjonsmining frå nattehimmelen.

Figur 1 viser ein enkel modell med éin observasjon og éi linse. Massen er koncentrert i to plan, linseplanet som me søker å kartleggja og kjeldeplanet som er opphav til den synlege observasjonen. Me føreset at linsemassen er koncentrert i eit plan og ikkje har utstrekking langs synslina. Denne sokalla tynnlinssetilnærminga er rimeleg fordi avstandane er astronomiske og tjukkna dermed neglisjerbar. Strengt teke er linse- og kjeldeplanet kuleoverflater, men når synsvinkelen er smal kan me likevel føresetja flate plan (flathimmeltilnærminga). I det følgjande lèt me  $D_L$  og  $D_S$  stå for kortaste avstand til hhv. linseplanet og kjeldeplanet.

Linsa dannar eit linsepotensial som er skildra som ein funksjon  $\psi(\xi)$  som gjev ein reell verdi for kvart punkt  $\xi$  i linseplanet. I figur 1 ser me korleis observert ljós som kjem gjennom  $\xi$ , ser ut til å koma frå  $\nu$  i kjeldeplanet, medan det i røynda kjem frå  $\eta$  og vert bøygd av linsa. Avbøyninga er bestemt av *raytrace*-likninga




Fig. 1: Observasjon av nattehimmelen gjennom ei gravitasjonslinse.

som er gjeven som

$$\eta - \nu = -D_S D_L \cdot \left( \frac{\partial \psi(\xi)}{\partial \xi_1}, \frac{\partial \psi(\xi)}{\partial \xi_2} \right). \quad (1)$$

Sidan avbøyninga er forårsaka av massen, må der vera ein samanheng mellom massettleiken  $\kappa$  og linsepotensialet  $\psi$ . Denne samanhengen skriv me som

$$\kappa(\xi) = \frac{D_L^2}{2} \nabla^2 \psi(\xi) = \frac{D_L^2}{2} \left( \frac{\partial^2 \psi(\xi)}{\partial \xi_1^2} + \frac{\partial^2 \psi(\xi)}{\partial \xi_2^2} \right). \quad (2)$$

*Merknad 1.* Oppmerksame leserar kan sjå at faktoren  $D_L$  er utelaten i programkoden, bortsett frå i forholdet  $\chi = D_L/D_S$  som skalerer storleikar mellom linse- og kjeldeplanet. Dette er fordi  $D_L$  og  $D_S$  forøvrig vert kansellert i alle vidare utrekningar, noko som kan vera tidkrevjande men ganske rett fram å stadfesta.

*Merknad 2.* Det er vanleg at linsa inneheld ljós materie i tillegg til mørk materie, slik at det er mogleg å fastsetja  $D_L$ , og me vil gå ut frå at dette er tilfellet og at både  $D_L$  og  $D_S$  er kjende størrelsar.

*Døme 1.* Den singulære isotermiske sfæremodellen (SIS) (sjå t.d. Schneider mfl., 1992, Sec. 8.1.4) har linsepotensiale

$$\psi_{\text{SIS}}(\xi) = \frac{R_E}{D_L^2} |\xi|, = \frac{R_E}{D_L^2} \sqrt{\xi_1^2 + \xi_2^2}, \quad (3)$$

der  $R_E$  er einsteinradien som gjev styrken (eller totalmassen) på linsa. *Raytrace*-likninga i SIS-modellen vert

$$\eta = \left(1 - \frac{R_E}{|\nu|}\right) \nu.$$

Sjølv om SIS er urealistisk, i og med at massen har uendeleig ustrekking, er modellen like fullt rekna som nyttig og mykje brukt i fysiske analysar.

Det er trivielt å simulera forvrengde biletet for ein gjeven kjelde- og linsemodell, i alle fall dersom  $\psi$  er deriverbar. For kvar piksel  $\nu$  i det forvrengde biletet, kan me rekna ut posisjonen  $\eta$  og *samla* kjelda. Utfordringa er å finna ein plausibel linsemodell  $\hat{\psi}$  for eit observert forvrengt biletet. Det generelle tilfellet, der  $\psi$  er ein vilkårleg funksjon, har uendeleig mange fridomsgradar og er dermed ikkje mogleg å løysa. Ei mogleg tilnærming er å føresetja ein konkret linsemodell (t.d. SIS) der ein berre treng å fastsetja nokon få parameter (som einsteinradien). Hezaveh mfl. (2017) brukte t.d. maskinlæring for å finna parametra i ein SIE-modell (singulær isotermisk ellipse). I praksis står me derimot gjerne overfor sokalla klyngelinser, der linsemassen er fordelt på fleire ulike objekt, kvar med sine parameter, og dette krev ein meir samansett modell.

I dette arbeidet tek me ei alternativ tilnærming. I staden for å fastsetja linsepotensialet  $\psi$  over heile definisjonsområdet, freistar me å skildra  $\psi$  lokalt rundt eitt einskild punkt  $\xi = \nu \cdot D_L / D_S$  i det forvrengte biletet. Dersom me kan gjera dette for fleire galaksar som er påverka av den same linsa, kan me i neste omgang freista å rekonstruera  $\psi$  globalt basert på fleire lokale skildringar.

### 3 Roulettemodellen

Rouletteformalismen vart introdusert av Clarkson (2016a) og utdjupa av Clarkson (2016b). I prinsippet er det ei taylorutviding av  $\psi$  rundt eit punkt  $\xi$  i linseplanet, og teknikken er godt etablert for svake linser der ein berre treng nokre få taylorledd for å få ei rimeleg nøyaktig tilnærming. Clarkson utvider denne teknikken for sterke linser ved å bruka fleire ledd, i kontrast til Fleury mfl. (2017) som utvider sterklinseteknikkar for svake linser.

For å simulera forvrengde biletet i rouletteformalismen, bruker me først *raytrace*-likninga for å finna punktet  $\xi_S$  i linseplanet, som svarer til sentrum  $\eta_S$  i




Fig. 2: Geometrien i den flate himmelen med dei kritiske punkta i roulettemodellen.

den opprinnelige kjelda. I SIS-modellen er  $\xi_S$  gjeven som

$$|\xi_S| = \frac{D_L}{D_S} \cdot |\nu_S| = \frac{D_L}{D_S} \cdot |\eta_S| + R_E.$$

Punktet  $\xi_S$  bruker me som referansepunkt for rouletteutvidinga (jf. figur 2). Den fyrste rouletteamplityden ( $\alpha_1^0, \beta_1^0$ ) er då avbøyninga  $\nu - \eta$ ,

$$\Delta\eta = \nu - \eta = -D_S \cdot (\alpha_1^0, \beta_1^0). \quad (4)$$

For å finna ljuset i eit vilkårleg punkt  $\nu$  nær  $\nu_S$ , bruker me roulettelikninga. Me fylgjer Clarkson og skriv punktet  $\xi$  i polarkoordinatar  $(r, \phi)$  med origo i  $\xi_S$ , og  $\eta$  i kartesiske koordinatar  $(x', y')$  med origo i  $\eta_S$ . Clarkson gjev oss då

$$\frac{D_L}{D_S} \cdot \begin{bmatrix} x' \\ y' \end{bmatrix} = r \cdot \begin{bmatrix} \cos \phi \\ \sin \phi \end{bmatrix} + \sum_{m=1}^{\infty} \frac{r^m}{m! \cdot D_L^{m-1}} \sum_{s=0}^{m+1} c_{m+s} (\alpha_s^m \mathbf{A}_s + \beta_s^m \mathbf{B}_s) \begin{bmatrix} C^+ \\ C^- \end{bmatrix} \quad (5)$$




Fig. 3: Simulering i roulettemodellen og samanlikning med *raytrace*.

der

$$C^\pm = \pm \frac{s}{m+1}, \quad (6)$$

$$c_{m+s} = \frac{1 - (-1)^{m+s}}{4} = \begin{cases} 0, & m+s \text{ er jamn,} \\ \frac{1}{2}, & m+s \text{ er odde,} \end{cases} \quad (7)$$

og

$$\mathbf{A}_s = \begin{bmatrix} \cos(s-1)\phi & \cos(s+1)\phi \\ -\sin(s-1)\phi & \sin(s+1)\phi \end{bmatrix}, \quad \mathbf{B}_s = \begin{bmatrix} \sin(s-1)\phi & \sin(s+1)\phi \\ \cos(s-1)\phi & -\cos(s+1)\phi \end{bmatrix}.$$

Me kan leggja merke til at  $\alpha_s^m$  og  $\beta_s^m$  forsvinn når  $m+s$  er jamn. I svak linsing er det normalt tilstrekkeleg å bruka det nullte ( $r(\cos\phi, \sin\phi)$ ) og fyrste ( $m=1$ ) leddet i (5). Det nullte leddet gjev forstørringa medan det fyrste, kjend som skjærret (eller *shear*), gjev elongeringa. Den kjende Kaiser-Squires-likninga fortel oss korleis ein kan rekonstruera linsepotensialet  $\psi$  frå desse to ledda (Normann & Clarkson, 2020).

Ledda av høgare orden ( $m > 1$ ) gjev informasjon om krumminga som oppstår i sterke linser. Enkelt sagt vil ein rund galakse sjå oval ut bak ei svak linse. Bak ei sterke linse vert galaksen krum som ein banan<sup>4</sup>. Svært sterke linseeffektar gjev ein sokalla einsteinring, der den fjerne galaksen ser ut som ein ring som strekker seg rundt linsa. Når Clarkson utvider den kjende svaklinsemmodellen for sterke linser, så reiser det spørsmålet om ogso Kaiser-Squires-likninga kan generaliseraast.

Koeffisientane  $\alpha_m^s$  og  $\beta_m^s$  i likningane over kallar me rouletteamplitydane. Normann og Clarkson (2020) har utleidd rekursive formlar for å finna algebraiske uttrykk for  $(\alpha_m^s, \beta_m^s)$  som funksjonar av  $\xi$  for alle  $m$  og  $s$ . Implementasjonen vår, slik han vart presentert på ECMS 2023 (Schaathun mfl., 2023), gjorde to ting. For det fyrste reknar han ut rouletteamplitydane for SIS, og for det andre simulerer han forvengde bilete iht. likning (5).

Me kan samanlikna simulering i roulettemodellen med den eksakte *raytrace*-simuleringa i figur 3. Den uendelege rekka i (5) må trunkeras i praksis, so me

---

<sup>4</sup> Eller kan henda meir som ei nyrebønne? Forfattarane er enno ikkje samde på dette punktet...

har simulert for  $m \leq 3$ ,  $m \leq 5$  og  $m \leq 15$ . Småbileta som ligg i ein ring rundt hovudbiletet er numeriske artifaktar. Ein kan visa at der alltid er  $m+1$  slike bilete når  $m$  er odde og  $m$  når  $m$  er jamn, og dei legg seg som ein ring rundt  $\xi_S$ . Radien i denne sokalla konvergensringen går mot  $|\xi_S|$  når  $m$  går mot uendeleig (Clarkson, 2016b). Det er sjølvagt mogleg å maskera ut modellartifaktane sidan me veit kvar dei ligg.

Me kan merka oss at roulettemodellen ikkje får med bibiletet som ligg nær sentrum i *raytrace*-biletet. Bibiletet er eit resultat av ljós som går den lange vegen rundt linsa på motsett side. Dette bibiletet hamnar alltid utanfor konvergensringen i roulette<sup>5</sup>. Bortsett fra bibiletet og dei falske bileta langs konvergensringen, ser med ei høveleg god tilnærming med fem ledd og med 15 ledd er biletet nær perfekt.

*Merknad 3.* Der finst ei rekke simulatorar for gravitasjonslinser. Særleg Lenstronomy (Birrer & Amara, 2018) og PyAutoLens (Nightingale mfl., 2021) er populære. Dei *tutorials* som finst for PyAutoLens gjev god innsikt i korleis ein kan byggja opp samansette linsemodellar og tilpasse parameter til empiriske bilete. Det som er nytt i tilnærminga vår er implementasjonen av rouletteformalismen og *lokal* skildring av linsepotensialet også for sterke linser.

## 4 Rekonstruksjonsmodell

Føresetnaden for å kunna bruka ei generalisering av Kaiser-Squires, er at me kan estimera rouletteamplitydane frå observerte bilete. Det er mogleg for skjæret, men for høgare orden finst der ingen analytisk metode i dag. Simulatoren som me har drøfta over gjer det derimot mogleg å generera store datasett, og det er verd å sjå om maskinlæring kan estimera rouletteamplitydane. Figur 4 viser ein fullstendig prosess som kombinerer rouletteformalismen med maskinlæring.

Dei raude boksane bruker simulatoren *CosmoSim* som me har implementert, testa og gjort tilgjengeleg som open kjeldekode<sup>6</sup>. For å generera treningsdata til maskinlæringa bruker me *raytrace*-likninga (1) for å generera bilete (*input*) og roulette-utrekninga (sjå avsnitt 3) for å generera amplitydane som er *output* (*ground truth*) i maskinlæringa. Roulettesimulatoren gjer det mogleg å simulera forvrengde bilete direkte frå rouletteamplitydane, utan å ha nokon eksakt linsemodell. Dette gjev eit ekstra høve til å validera resultat, både under trening og i faktisk bruk. Bilete frå roulettesimuleringa gjev ei referansesanning som kan samanliknast med *input* til maskinlæringa. Dersom det estimerte biletet ikkje stemmer me det røynde biletet, veit me at dei estimerte amplitydane er unøyaktige eller feile.

Me kjem tilbake til maskinlæringsdelen i avsnitt 5. Det som me har kalt funksjonstilpassing i figuren, svarer til Kaiser-Squires-likninga. Basert på estimerte

<sup>5</sup> Det er mogleg å bruka rouletteformalismen rundt eit anna punkt, og dermed teikna bibiletet, men sidan konvergensringen alltid går gjennom linsa, vil ein aldri kunna få med både bileta i same roulettemodell.

<sup>6</sup> Publisert på github. Drøftinga her tek utgangspunkt i versjon 2.3.0: <https://github.com/CosmoAI-AES/CosmoSim/releases/tag/v2.3.0>.




Fig. 4: Prosessmodell. Lokal rekonstruksjon av linsepotensial.

rouletteamplitydar, ynskjer me å finna eit estimat  $\hat{\psi}$  for linsepotensialet. Det er viktig å merka seg at eitt sett med rouletteamplitydar berre gjev lokal informasjon om linsepotentialet rundt eitt punkt. Dersom me skal estimera  $\psi$  over heile definisjonsområdet vil me måtte bruka biletet av fleire forvrengde galaksar og rouletteamplitydane rundt kvar av dei. Dette er ofte mogleg i empiriske biletet, der ein kan sjå mange galaksar som er forvrengde av den same linsa. Denne funksjonstilpassinga står att som eit ope problem.

Biletet vert sentrerte for å unngå å lekkja informasjon om linseposisjonen relativt til den synlege galaksen. Me reknar ljossentrum i biletet ved å ta gjennomsnitt av pikselindeksane vekta med ljositensiteten. Biletet vert so translatert slik at ljossentrum vert sentrum i biletet. Dette gjev ein kanonisk form som me også kan finna for røynlege biletet

#### 4.1 Rekonstruksjonssimulatoren

Som me har nemnd bruker *raytrace*-simulatoren eit koordinatsystem med origo på den optiske aksen (gjennom linsa). Når me simulerer med utgangspunkt i rouletteamplitydane er linsesentrum i prinsippet ukjend. Rett nok kan der vera noko ljós som gjev ein omrentleg linseposisjon, men me vil ikkje gå ut frå at dette gjev ein tilstrekkeleg presis posisjon. Det er òg grunnen til at biletet vert sentrert rundt ljossentrum.

For å rekonstruera det forvrengde biletet treng me informasjon om kjelda, i tillegg til rouletteamplitydane som gjev informasjon om linsa. Kjeldesentrum er representert som  $\xi' = (\xi'_1, \xi'_2)$  relativt til origo i ljossentrum. For ei sfærisk kjelde treng me dessutan storleiken, som i *CosmoSim* er representert som standardavviket  $\sigma$  i ein gaussisk ljosfordeling. Andre kjeldemodellar krev fleire parameter, men det har me ikkje testa i denne studien.

Dei tre parametra  $\sigma$ ,  $\xi'_1$  og  $\xi'_2$  vert inkludert i datasettet i maskinlæringa, saman med rouletteamplitydane.

#### 4.2 Oversikt over implementasjonen

Sjølv simulatoren i *CosmoSim* er eit bibliotek i C++. To brukargrensesnitt er implementerte i Python. Kommandolinegrensesnittet som me bruker her, er designa for satsgenerering av biletet. GUI-verktyet drøfta me på ECMS (Schaathun mfl., 2023), og det er ikkje relevant her.

Simulatoren fylgjer ein enkel objektorientert struktur. Eit *Source*-objekt definerer den synlege galaksen og genererer biletet slik det hadde sett ut utan gravitasjonslinsa. Her har me implementert underklasser for sfæriske og elliptiske linser, samt ein trefarga trekant til illustrasjonsformål.

Rouletteamplitydane vert rekna ut symbolsk, vha. *sympy*-biblioteket i python, og skrive til ei fil som vert lese i C++-biblioteket, som so evaluerer amplitydane i konkrete punkt.

Eit *Lens*-objekt definererer linsemodellen med alle dei analytiske eigenskapane som er kjende. Særleg er det  $\psi$  med dei to fyrsteordens partiellderiverte og

rouletteamplitydane som trengst i simulatoren. Her har me førebels berre implementert ei underklasse for SIS, samt ei klasse som *sampler* ein anna linsemodell og reknar med numerisk derivasjon. Sistnemnde kan vera nyttig til meir kompliserte linsemodellar der symbolsk derivasjon ikkje er mogleg innanfor rimeleg tid.

Sjølv simulatoren er ei underklasse av *LensModell*. Her har me implementert *RaytraceModel* og *RouletteModel*. Dei tek ei *Source* og ei *Lens* og bruker hhv. (1) og (5) for å transformera biletet frå *Source* til eit realistisk forvrengd bilete slik det vert observert. *RaytraceModel* hentar dei partielleiverte av  $\psi$  frå *Lens*-objektet medan *RouletteModel* bruker rouletteamplitydane.

For å rekonstruera biletet frå rouletteamplitydane aleine, bruker me ei tredje *LensModel*-klasse, *RouletteRegenerator*, som ikkje bruker noko *Lens*-objekt. Simuleringa er den same som i *RouletteModel*, men rouletteamplitydane vert sette direkte i *RouletteRegenerator*, ingen annan informasjon om linsa vert tilgjengelig.

Kommandolineprogrammet, slik me normalt bruker det, tek ein CSV-fil med linse- og kjeldeparameter og genererer eitt bilete per rad. I tillegg kan det, i same prosess, generera ei ny CSV-fil med rouletteamplitydane.

## 5 Resultat

For å demonstrera at rammeverket har noko for seg, presenterer me ein konkret serie av testar. Me har førebels gjort lite for å optimalisera maskinlæringsoppsettet eller utfallsrommet for datasettet, og ein lyt difor lesa det som eit døme og ikkje som eit råd til endeleg løysing.

### 5.1 Biletgenerering

Datasettet simulerer ei sfærisk kjelde sett gjennom ei SIS-linse. Relativ avstand til linsa,  $\chi = D_L/D_S$  set me konstant lik 0,5. Dette gjev fire variable parameter: storleiken (standardavviket)  $\sigma$  for kjelda, einsteinradien  $R_E$ , og kjeldeposisjonen som me skriv i polarkoordinatar  $(R, \phi)$ . Desse dreg me uniformt tilfeldig frå fylgjande sannsynsfordeling:

$$\begin{aligned} \sigma &\in \{1, 2, \dots, 60\}, & R_E &\in \{5, 6, \dots, 50\}, \\ \phi &\in \{0^\circ, 1^\circ, \dots, 359^\circ\} & R &\in \{R_E, R_E + 1, \dots, 100\} \end{aligned}$$

Polarkoordinatane vert rekna om til kartesiske koordinatar  $(x, y)$  som vert brukte i maskinlæringa, men me merker oss at det er avstanden  $R$  til origo som er uniformt fordelt, ikkje  $x$ - og  $y$ -koordinatane.

For å vurdera køyretid, har me køyrd sju samtidige satsar à 20 000 bilete. Kvar sats tek 59–65 minutt sanntid og 138–170 minutt CPU-tid på åtte kjernar<sup>7</sup>. Dette er overkommeleg, og langt fleire bilete enn me bruker i den vidare testen.

---

<sup>7</sup> Me har brukt tungreiningsklynga IDUN ved NTNU, og me har ikkje registrert kva node som har vore tildelt og dermed kjenner me ikkje prosessorspesifikasjonane.

Forsøk med fleire samtidige jobbar gjev lengre køyretid, og det er rimeleg å gå ut frå at flaskehalsen er skriving til disk.

Skriptet `datagen.py` genererer både bileta og CSV-filen med rouletteamplitydar; som fylgjar

```
python3 CosmoSimPy/datagen.py -D <biletkatalog> \
    -C -Z 800 -z 400 --lensmode SIS --modelmode Raytrace \
    --nterms 5 --outfile roulette.csv --csvfile dataset.csv \
    --xireference
```

Her lagar me bilete på  $800 \times 800$  som vert klipt til  $400 \times 400$  etter sentrering. Rouletteamplitydane vert funne for  $m \leq 5$ . Oppsjonen `-xireference` seier at rouletteamplitydane vert rekna i den tilsynelatende posisjonen til sentrum i kjelda. Dette ligg normalt ikkje i ljossentrum av det forvrengde biletet.

Me simulerer dei forvrengde bileta i rouletteformalismen som referanse. Fordi denne simulatoren har eit anna API, vert dette gjort med eit eige skript, som fylgjer.

```
python3 CosmoSimPy/roulettogen.py -D <roulettebilettekatalog> \
    -n 5 -Z 400 --csvfile roulette.csv --xireference
```

Køyretida er 29–30 min. samtid og 98–99 min. CPU-tid per sats på 20 000 bilete.


Datasettet omfattar 33 søyler som trengst for å kunne resimulera det forvrengde biletet i rouletteformalismen. Der er 30 rouletteamplitydar for  $m = 0, \dots, 5$ , samt linseparameteren  $\sigma$  og kjeldesentrum  $\xi'$  relativt sentrum i biletet (ljossentrum).

## 5.2 Maskinlæring

Til maskinlæringa har me brukt Inception v3, modifisert for å ta éin kanal (gråtone) inn og gje regresjonsdata ut, i staden for klassifisering. Modifikasjonane er tekne frå arbeidet åt Ingebrigtsen mfl. (2022). Optimeringsalgoritma er Adams der alle parameter har initialinstillingar bortsett frå læringsraten  $\alpha = 0,0001$ . Som tapsfunksjon bruker me gjennomsnittleg kvadratfeil (MSE). Me har brukt 4000 bilete til trening og 10 000 til testing. Med 50 epokar tek dette under to timer på ein NVIDIA A100 (GPU).

Figur 5 viser rekonstruerte bilete basert på estimerte amplitydar. I det eine biletet, der kjelda er stor, ser me ingen gjenkjennelege drag. I det andre, med ei mindre kjelde, ser me tydeleg at både retning frå origo og krumming er riktig, sjølv om rekonstruksjonen er langt frå nøyaktig. Me kan dermed slutta at det er mogleg å dra relevant informasjon ut av biletet vha. maskinlæring, og det er sannsynleg at ein kan finna betre resultat om ein legg arbeide i det.

Ein kan stussa på at det rekonstruerte biletet i figur 5a ikkje har dei falske bileta jamnt fordelt rundt konvergensringen. Dette skuldast sannsynlegvis at dei estimerte amplitydane ikkje treng å svara til ein kontinuerleg og deriverbar



(a) Døme på rimeleg biletetestimat.      (b) Døme på därleg estimert bilete.

Fig. 5: Samanlikning av rekonstruerte bilete. I kvar montage har me opprinnelag bilete øvst til venstre. Roulettesimulering frå faktiske amplitydar øvst til høgre og frå estimerte amplitydar nedst til høgre. Nedst til venstre ser me differansen mellom dei to roulettesimuleringane.

funksjon  $\psi$ . Estimeringsfeilen kan gje artifaktar som ikkje er moglege i utgangspunktet.

Figur 6 viser kvantitativ evaluering av maskinlæringsoppsettet. Der er to ting som me skal merka oss. For det fyrste vert  $\xi'$  systematisk underestimert, noko som òg gjev forskyvinga i det rekonstruerte bilete i figur 5a. For det andre har me jamm betring i tapsfunksjonen i ni epokar, før tapsfunksjonen tek til å svinga. Det tyder på at læringsraten er for høg etter dei ni epokane.

## 6 Vegen vidare

Me har etablert eit rammeverk for å arbeida med rekonstruksjon av rouletteamplitydar vha. maskinlæring. Dette opnar ei lang rekkje gode problem for vidareforsking. Innanfor maskinlæring gjenstår arbeidet med å finna god nettverksdesign og optimalisera hyperparameter.

Me har framleis ikkje sett på testing med empiriske datasett. Dette er krevjande fordi astronomiske avstandar gjev låg oppløysing og ein må ta omsyn til optiske artifaktar i teleskopa. Tilretteleggjing av datasett frå røynda og tilpassing av treningssettet til empiriske data er den største og kanskje mest spanande utfordringa framover.

Innanfor matematisk fysikk gjenstår arbeidet med å generalisera Kaiser-Squires eller utarbeida andre teknikkar for å rekonstruera linsepotentialet. Til




Fig. 6: Evaluering av maskinlæringstesten.

sist vil det òg vera nyttig å utvida simulatoren med andre linse- og kjeldemodellar.

## Referansar

- Bertone, G., & Tait, T. M. P. (2018). A new era in the search for dark matter. *Nature*, 562(7725), 51–56. <https://doi.org/10.1038/s41586-018-0542-z>
- Biggio, L., Verneratos, G., Galan, A., Peel, A. & Courbin, F. (2023). Modeling lens potentials with continuous neural fields in galaxy-scale strong lenses. *A&A*, 675, A125. <https://doi.org/10.1051/0004-6361/202245126>
- Birrer, S., & Amara, A. (2018). lenstronomy: Multi-purpose gravitational lens modelling software package. *Physics of the Dark Universe*, 22, 189–201. <https://doi.org/10.1016/j.dark.2018.11.002>
- Clarkson, C. (2016a). Roulettes: a weak lensing formalism for strong lensing: I. Overview. *Classical and Quantum Gravity*, 33(16). <https://doi.org/10.1088/0264-9381/33/16/16lt01>
- Clarkson, C. (2016b). Roulettes: a weak lensing formalism for strong lensing: II. Derivation and analysis. *Classical and Quantum Gravity*, 33(24), 245003. <https://doi.org/10.1088/0264-9381/33/24/245003>
- Fleury, P., Larena, J., & Uzan, J. P. (2017). Weak Gravitational Lensing of Finite Beams. *Physical Review Letters*, 119(19). <https://doi.org/10.1103/PhysRevLett.119.191101>
- Hezaveh, Y. D., Levasseur, L. P., & Marshall, P. J. (2017). Fast automated analysis of strong gravitational lenses with convolutional neural networks. *Nature*, 548(7669), 555–557. <https://doi.org/10.1038/nature23463>
- Ingebrigtsen, S., Remøy, S. W., Runde, S. N., & Austnes, E. L. (2022). CosmoAI: A study of gravitational lensing through simulation and machine learning [Final year dissertation]. <https://ntnuopen.ntnu.no/ntnu-xmlui/handle/11250/3003634>
- Nightingale, J. W., Hayes, R. G., Kelly, A., Amvrosiadis, A., Etherington, A., He, Q., Li, N., Cao, X., Frawley, J., Cole, S., Enia, A., Frenk, C. S., Harvey, D. R., Li, R., Massey, R. J., Negrello, M., & Robertson, A. (2021). ‘PyAutoLens’: Open-Source Strong Gravitational Lensing. *Journal of Open Source Software*, 6(58), 2825. <https://doi.org/10.21105/joss.02825>
- Normann, B. D., & Clarkson, C. (2020). Recursion relations for gravitational lensing. *General Relativity and Gravitation*, 52(3). <https://doi.org/10.1007/s10714-020-02677-z>
- Schneider, P., Ehlers, J., & Falco, E. E. (1992). *Gravitational Lenses*. <https://doi.org/10.1007/978-3-662-03758-4>
- Schaathun, H. G., Normann, B. D., Austnes, E. L., Ingebrigtsen, S., Remøy, S. W., & Runde, S. N. (2023). On the simulation of gravitational lensing [Florence, Italy, 21-23 June 2023]. I E. Vicario, R. Bandinelli, V. Fani & M. Mastroianni (Red.), *Proceedings of the 30th European Conference on Modelling and Simulation*. ECMS - European Council for Modelling; Simulation.